

25

D’OCTÔBE

(rsatchoz mwins d’ noûf mwès, aloz sawè !)
Ricwardâdje d’ène arivêye (o
dobén d’on dèpârt ?)

Wêtoz. Après awè ostant coru dji n’sêu
min.me nén coût d’ alin.ne. Èco, kan dji di
“coru”, dji duvrêve dire ki dji m’a trin.né dsus
m’ vinte èt m’cotaper pîre qu’on diâle k’arêve
tchèyu dins l’ bènîf d’ ène èglîje di Lèfèvrîsse.
Dj’a suwé song èt eûwe, pou n’bate insi kd’ène
bén coûte tièsse l’plin.ne tchèrtêye d’mès
frères coreûs, mins dj’ avêve è m’sicoriye tote
li fwâce ki falêve èt i m’é dmère co assez po
skèter li scafiote ki m’èspêche d’intrer au
tchaud è z-î fé m’bouye.

Dji boute, dji boute. C’ èst deûr, deûr, mins dji
l’sént bén k’dji va bén râde î z-ariver. Dj’a
têlmint d’fwâce è m’capotine ki dji seû min.me
capâbe, tot-ovrant, di tûzer à tot c’ki vént
d’m’ariver èt sayî d’comprinde po vos conter
sins rén roviyî. Comint k’ça z-a-t-i
comincî ? Taurdjèz kça m’rivègne.

Ah, oyi, dji mèl rimimbère. On
dwârméve tèrtos èchène,
racrapotés yink dsus l’ôte, cou :’
dzu, cou dzos. Bén au rwè.

Djusse wachotés c’ki
falêve po ièsse bêrcîs
è fé



dès rêves di voyâdjès è
coleûrs dins d’ isondâbès bleuwès laurdjeûs.

Adon, sins vrêmint k’n’î uche dès soumonces,
vl’a-ti nén ki l’ wachotâdje s’a d’on randon
ènondé. On a stî tèrtos dispièrtés èt s’ritrover
machîs k’dji n’wazèrêve nén vos dire comint.
Ké wachisse mès béns tchèrs frères ! à n’ pus
sawè kwè. L’trimblumint a divnu si fwârt
k’sakants d’nos ôtes ont stî misbridjîs èt î
dmèrer dsus place à s’î codwâde kan on a stî
spritchî foû èvoye d’nosse maujone. Dji dit
maujone, paski dji n’sé nén Bén vos dire
èwousk’on èstîne. I gn’avêve pont d’ fènièsse
ni d’ lumère. Tèrtous èchène, d’grands
clicotants triyanâdjès nos-ont mètu à l’ uch foû
d’nosse tchaud niyau. Adon on s’a mètu tèrtos
à ran.ner tot drwèt po z’ariver au pus râde.
Ariver èwou ? On nèl savêve nén. Chake di
nos sintêve è s’boutike k’i lî falêve ariver pus
lon, au pu râde èt î ièsse li prumî. Èt ki dji
m’cotape, ki dji m’cotwade, ki dji t’done dès
côps d’ flaya à tos mès frères tot sayant d’
nawî dins d’glumiantès eûwêyes. L’ voye a
duré, l’ ridante trote a stî deûre. Inte nos ôtes,
on n’si fiêve pont d’ bistoke. Dès miyions
k’nos èstîne lançî dins s’maraton d’ coûse là.
On s’ plotêve, on si lèyêve nén fé. Miyârd di

miyârd. Dj’a tant agnî dsus m’
chike k’dj’è n’a co mau a mès
massales. I m’ falêve gangnî.
C’èst mi ki l’ duvéve gangnî l’
potêye d’ fleurs à flotche di
prumî. Po aané, dj’a aané.
Dj’a suwè d’pus ki l’ z-ôtes
èt mi vla. Nos èstîne co kat,
tièsse à tièsse, à deûs
mulimulimètes do but. Ène
grosse bole ki c’èst ! l’
vèyoz ? c’èst mi ki l’a
djondeûwe l’ prumî èt
mî aclaper di totes mès
fwâces. Mins vola,
c’èst nén asséz d’ièsse
à place, i m’ faut co î
mûchi au ddins. Sins-
awè d’kwè l’
apougnî, i m’ faut fé
po trover l’ moyin d’
î fé on trau; i m’ faut
brîjî li scafiote, m’ î
stitchî èt z-î muchî au
mêr profond. Sarîz
m’dire pokwè dj’a l’
sintumint k’dj’a on
patrimwin.ne a z-î

lèyî ? Nêlu n’ara m’
portrait aclawé au meur mins
dj’a dins l’ idêye k’on va s’sovenu d’

mi...

On saye di continuer à tot comachî...